



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
DOM NARODA

Administrativna komisija
Komisija za finansijske i administrativne poslove
Broj: 01/7, 02/3-011-509/03
Sarajevo, 30.06.2003. godine

ZAPISNIK

3. zajedničke sjednice Administrativne komisije Predstavničkog doma i Komisije za finansijske i administrativne poslove Doma naroda Parlamentarne skupštine BiH. Sjednica je održana 30.06.2003. godine, u vremenu od 14,00 do 16,30 sati.

Sjednici su prisustvovali članovi Administrativne komisije Predstavničkog doma:

Munib Jusufović, Nikola Kragulj, Ivo Miro Jović, Jozo Križanović, Momčilo Novaković, Šefik Džaferović, Mirko Blagojević i Vinko Zorić. Opravdano odsutan bio je Hazim Felić.

Sjednici su prisustvovali članovi Komisije za finansijske i administrativne poslove Doma naroda: Zoran Spasojević, Mustafa Pamuk, Osman Brka, Branko Zrno, Goran Milojević i Velimir Jukić.

Sjednici su prisustvovali i Vedran Hadžović, sekretar Zajedničke službe, Branka Todorović, sekretar Predstavničkog doma, Aljoša Čampara, sekretar Ustavno-pravne komisije i privremeni sekretar Komisije za finansijsko-administrativne poslove Doma naroda, Jadranka Korać, šef Službe računovostva i Dragica Hinić, stručni saradnik u radnim komisijama Parlamentarne skupštine BiH.

Sjednici su kao predstavnici Izborne komisije BiH prisustvovali Hilmo Pašić, predsjednik i Lidija Korać, sekretar.

Sjednicom je predsjedavao Munib Jusufović.

Na sjednici je predložen sljedeći

DNEVNI RED

1. Usvajanje zapisnika 2. zajedničke sjednice administrativnih komisija oba doma;
2. Prijedlog Odluke o izmjenama i dopunama Pravilnika o plaćama i nadoknadama državnih službenika i namještenika u Sekretarijatu Parlamentarne skupštine BiH;
3. Prijedlog Odluke o godišnjim odmorima za članove Parlamentarne skupštine BiH;
4. Razmatranje zahtjeva g-dina Šefika Džaferovića;
5. Dogovor o pripremi Zakona o pravima poslanika i delegata u PS BiH;
6. Donošenje odluke o odobravanju knjiženja i isplati plaća i naknada poslanicima za mjesec decembar 2002. godine na teret tekuće budžetske godine;
7. Prijedlog odluke o isplati paušala članovima stalne delegacije Parlamentarne skupštine BiH pri Parlamentarnoj skupštini Vijeća Evrope;
8. Razmatranje prijedloga Izborne komisije BiH i Kolegija Predstavničkog doma o reguliranju radno-pravnog statusa članova Izborne komisije BiH;
9. Razno.

Konstatirano je da su tačke 8. i dijelom tačka 9. predloženog dnevnog reda u nadležnosti Administrativne komisije Predstavničkog doma . Iz tog razloga, kao i iz razloga prisustva predstavnika Izborne komisije BiH, dok se čekao dolazak članova Komisije Doma naroda, članovi Komisije Predstavničkog doma jednoglasno su odlučili da prihvate predloženi dnevni red 3. zajedničke sjednice koji isključuje tačke 8. i dijelom tačku 9. Ove tačke razmatrat će se odmah, kao tačke 1. i 2. dnevnoga reda sjednice Administrativne komisije Pradstavničkog doma.

Ad.1.

Zapisnik 2. zajedničke sjednice članovi obje komisije usvojili su jednoglasno.

Ad.2.

Munib Jusufović ukratko je informirao o Prijedlogu odluke o izmjenama i dopunama Pravilnika o plaćama i nadoknadama državnih službenika i namještenika u Sekretarijatu Parlamentarne skupštine BiH.

U potom otvorenoj raspravi učestvovali su: Zoran Spasojević, Vedran Hadžović, Momčilo Novaković, Mustafa Pamuk, Munib Jusufović, Šefik Džaferović, Osman Brka i Branka Todorović.

U raspravi je potencirano nekoliko pitanja i to pitanje koeficijenata za plaće savjetnika, pitanje prava na naknadu za odvojen život od porodice, smještaj i prevoz, pitanje povećane plate državnom službeniku u slučajevima kada obavlja dva ili više poslova zbog nedovoljno zaposlenih radnika. Iz rasprava svih učesnika, kao osnovno pitanje koje treba regulirati, postavljeno je pitanje izrade Odluke o organizaciji Sekretarijata PS BiH. Tek po usvajanju ove odluke, koja je po mišljenju većine, gotovo usaglašena između oba kolegija, može se ići na izmjene Pravilnika koji tretira sva navedena pitanja.

Po okončanoj raspravi, članovi obje komisije jednoglasno su prihvatili zaključak da se što prije okonča postupak izrade Odluke o organizaciji Sekretarijata PS BiH, te da se na osnovu te odluke integralno urade izmjene i dopune Pravilnika o plaćama i nadoknadama državnih službenika i namještenika PS BiH, koje će obuhvatati sva značajna pomenuta pitanja vezana za rad ovih lica, kao i savjetnika članova kolegija.

Dok se ova pitanja definitivno ne reguliraju, članovi obje komisije jednoglasno su donijeli odluku, u skladu s Zakonom o državnoj službi , kojom se državnim službenicima koji imaju prebivalište dalje od 50 km od mjesta rada, omogućuje isplata naknade za odvojen život od porodice u visini od 240,00 km, pored ostalih naknada po ovom osnovu utvrđenih Pravilnikom. Ova odluka je privremenog karaktera i bit će na snazi dok se predmetna pitanja statusa državnih službenika definitivno ne reguliraju.

Ad.3.

Munib Jusufović ukratko je informirao o Prijedlogu odluke o godišnjim odmorima članova Parlamentarne skupštine BiH za ovu godinu, koju su članovi obje komisije, nakon kraće rasprave, jednoglasno usvojili.

Velimir Jukić je potom informirao da je Kolegij Doma naroda donio odluku da se godišnji odmori u Domu naroda koriste od 12. ili 16.07.2003. godine.

Ad.4.

Munib Jusufović otvorio je ovu tačku dnevnog reda i dao riječ Šefiku Džaferoviću koji je potom dao kratko obrazloženje. Istaknuo je da usvojeno povećanje keoficijenata plaća poslanika nije planirano i dovodi do prekoračenja Budžeta za ovu godinu, čime se krši Zakon o izvršenju Budžeta.Ova odluka je donesena na osnovu pretpostavljenog rebalansa. Po

njegovom mišljenju plaće poslanika ne mogu biti veće od plaća ministara niti članova Predsjedništva BiH. S obzirom na navedeno, kao i opće teško stanje u BiH, on je predložio da se donesena odluka stavi van snage.

U potom otvorenoj diskusiji učestvovali su svi prisutni članovi obje komisije.

Većina članova istaknula je da je osnovni princip kojim su se rukovali pri donošenju ovakve odluke, bio usklađivanje koeficijenata plaća sa predsjedavajućim i ministrima u Vijeću ministara BiH, a da tada niko nije ni postavio pitanje visine osnovice za obračun plaća. Naglašeno je ponovo, da su ti koeficijenti bili identični sa koeficijentima ministara u Vijeću ministara BiH, počev od prvog saziva PS BiH i da se ovim izjednačavanjem samo ispravila greška. Generalni stav prilikom donošenja ove odluke je bio također, da će se povećanje kretati u okviru raspoloživih sredstava u Budžetu svih institucija BiH, te da stoga nema kršenja Budžeta niti Zakona o izvršenju Budžeta.

Istaknuto je da je pitanje preispitivanja ove odluke u nadležnosti obje administrativne komisije, a ne u nadležnosti domova, što je jasno pokazano u slučaju rezolucije predlagača Zlatka Lagumdžije na Predstavničkom domu, koja treba proći prvo komisijisku fazu.

Također je istaknut stav da članovi komisija moraju imati jedinstven nastup prema javnosti kada donose odluke, bez obzira kakvo je njihovo mišljenje i kako su glasali.

Kako je g-din Džaferović ovaj zahtjev uputio samo Administrativnoj komisiji Predstavničkog doma, to se postavila proceduralna dilema, da li će o istom uopće glasati članovi Komisije Doma naroda. Nakon kraće rasprave, dilema je riješena tako što su se članovi Komisije doma naroda prvo izjašnjavali o tome da li će uopće glasati o zahtjevu g-dina Džaferovića.

Po okončanoj raspravi izjašnjavali su se članovi obje komisije.

Članovi Komisije Predstavničkog doma izjasnili su se na slijedeći način:

a) O prijedlogu Š.Džaferovića za preispitivanje donijete odluke :

Za je glasao 1 član, protiv je bilo 5, a uzdržana 2 člana.

b) Za potvrđivanje ranije donesene odluke komisija:

Za je glasalo 6 članova, protiv 1 i uzdržan 1.

Komisija Doma naroda je prvo glasala o tome da li će se uopće izjašnjavati o zahtjevu g-dina Džaferovića za preispitivanje odluke. Sa 4 glasa za i 2 uzdržana glasa članovi Komisije Doma naroda su prihvatili da se izjašnjavaju o zahtjevu g-dina Džaferovića.

Za preispitivanje odluke o povećanju koeficijenata i vraćanje koeficijenata na staro nije dao glas niti jedan član Komisije Doma naroda, dok je 6 glasova bilo protiv.

Ad.5.

Munib Jusufović informirao je prisutne da je na radno-konsultativnom sastanku predsjedavajućih i zamjenika obje komisije predložena radna grupa za izradu prijedloga Zakona o pravima poslanika i delegata u PS BiH. Članovi grupe bili bi Munib Jusufović, Zoran Spasojević, Vinko Zorić iz reda poslanika-delegata, dok bi iz reda stručnih lica grupa uključivala Vedrana Hadžovića, Branku Todorović, savjetnike članova Kolegija Doma naroda: Senadu Merzić, Sinišu Daviodović i Magdalenu Mišković, te Dragicu Hinić kao sekretara radne grupe. Predloženi članovi radne grupe već su dobili materijale neophodne za izradu prijedloga zakona.

Iz rasprave je proizašlo mišljenje da se pored predloženih lica, u rad radne grupe moraju uključiti i članovi oba kolegija. Također, istaknuto je nastojanje da se ovaj posao vezan za izradu Zakona o pravima poslanika i delegata, što prije i kvalitetno okonča.

Po završenoj raspravi članovi obje komisije jednoglasno su verificirali prijedlog naprijed navedene radne grupe upotpunjene s članovima oba kolegija. Za predsjedavajućeg radne grupe imenovan je Munib Jusufović, a za zamjenika predsjedavajućeg Zoran Spasojević.

Sastanak radne grupe bi trebao biti održan oko 15.07.2003. god.

Ad.6.

Jadranka Korać ukratko je informirala o potrebi donošenja jedinstvene odluke kojom se odobrava knjiženje i isplata plaća i naknada poslanicima koji su profesionalizirali svoj rad u PS BiH, za mjesec decembar 2002. godine, na teret tekuće budžetske godine. Ovu odluku je neophodno donijeti na zahtjev Ureda za reviziju institucija BiH.

Po informiranju, članovi obje komisije su se izjasnili o prijedlogu.

Članovi Komisije Predstavničkog doma su o predloženoj odluci glasali tako da je za glasalo 6 članova, protiv je bio 1 član i uzdržan 1 član.

Članovi Komisije Doma naroda su se jednoglasno, s 6 glasova za izjasnili za usvajanje predložene odluke.

Ovim je odluka usvojena.

Ad.7.

Po zahtjevu za isplatu paušala članovima delegacije Parlamentarne skupštine BiH u Parlamentarnoj skupštini Vijeća Evrope, Munib Jusufović predložio je da se isti odbije, ali da se pokrene inicijativa i uputi dopis Vijeću ministara BiH radi preispitivanja visine dnevnica u zemlji i inostranstvu, s obzirom da su zbilja niske i ne mogu pokriti troškove boravka u sadašnjem trenutku. Posebno je naglašeno da je visina dnevnica u zemlji jako mala i da ne bi trebala biti manja od 50,00 KM. Ukoliko članovi komisija prihvate ovu inicijativu, time se automatski odbija zahtjev za isplatu paušala. Naglašeno je da će i ovo pitanje, kao i sva druga pitanja biti u potpunosti regulirano Zakonom o pravima poslanika i delegata.

Nakon kraće rasprave pristupilo se glasanju.

Članovi obje komisije jednoglasno su glasali za prijedlog o upućivanju inicijative Vijeću ministara radi preispitivanja visine dnevnica u zemlji i inostranstvu. Time je jednoglasno odbijen zahtjev za isplatu paušala članovima delegacije PS BiH pri PS Vijeća Evrope.

Ad.8.

Razno:

a) Po zahtjevima Merdžane Iglice i Samira Čorovića kao sekretara delegacija i protokola, za naknadu povećanih troškova korištenja mobilnog telefona za službene potrebe Parlamentarne skupštine BiH, u periodu mart-maj tekuće godine, članovi obje komisije jednoglasno su donijeli odluku da se odobri ova naknada.

Jednoglasno je također odlučeno, da se mogu donositi samo pojedinačne odluke kada u konkretnom slučaju dođe do prekoračenja iz opravdanih razloga, a da ne treba mijenjati odluku koju su ove komisije donijele vezanu za korištenje mobilnih telefona.

b) Članovi obje komisije jednoglasno su usvojili zaključak da se izjadnače visine naknada za korištenje mobilnih telefona članovima kolegija oba doma sa naknadama ministrima u Vijeću ministara BiH. Stoga je potrebno od Vijeća ministara zatražiti informaciju o visini pomenutih naknada.

c) Zbog potreba posla i neophodnosti svakodnevnog kontakta predsjedavajućeg Kolegija Doma naroda sa vozačem Zdravkom Granikom, za kupovinu mobilnog telefona imenovanom u vrijednosti do 200,00 KM, glasalo je 7 članova Administrativne komisije Predstavničkog doma, 1 je glasao protiv, dok su se za kupovinu mobilnog telefona imenovanom članovi Komisije Doma naroda jednoglasno izjasnili.

d) Vedran Hadžović i Jadranka Korać informirali su o zahtjevu Ahmeda Jalovčića za isplatu dnevnica koje daje Vijeće Evrope za službena putovanja u inostranstvo. Podnosilac zahtjeva

mišljenja je da ima pravo na isplatu dnevnica koje daje organizator, što je u ovom slučaju bila Parlamentarna skupština Vijeća Evrope, s obzirom da je poziv za putovanje upućen na njegovo ime. Vedran Hadžović je istaknuo da organizator putovanja šalje pozivno pismo Parlamentarnoj skupštini BiH, nakon čega Kolegij Sekretarijata određuje državnog službenika koji će putovati, a ne organizator. Potom organizator šalje dopis na ime državnog službenika, što je u ovom slučaju podnosilac zahtjeva. Imenovani je na put otišao s akontacijom, putnim nalogom i plaćenim avionskim kartama od Parlamentarne skupštine BiH, koje je po povratku bio dužni pravdati. Stoga, po njegovom mišljenju zahtjev Ahmeda Jalovčića nije opravdan i treba ga odbiti.

U potom otvorenoj raspravi učestvovali su Šefik Džaferović, Vinko Zorić i Zoran Spasojević. Nakon kraće rasprave članovi komisija izjasnili su se o zahtjevu podnosioca Ahmeda Jalovčića tako da je:

- Komisija Predstavničkog doma odbila zahtjev sa 7 glasova i 1 uzdržanim glasom, dok je Komisije Doma naroda odbila zahtjev jednoglasno.

Članovi obje komisije su potom jednoglasno usvojili zaključak da ubuduće svaki pojedinačni zahtjev upućen komisijama, mora biti pravno obrađen sa odgovarajućim obrazloženjima i mišljenjem Sekretarijata, kako bi članovi komisija mogli imati jasnu sliku o problemu i kako se ne bi donosile različite odluke u istovjetnim slučajevima.

Zapisnik sačinila:

Dragica Hinić

Predsjedavajući
Komisije za finansijske i administrativne poslove
Doma naroda
Zoran Spasojević

Predsjedavajući
Administrativne komisije
Predstavničkog doma
Munib Jusufović